

Thursday, April 23, 2026

Time - 2:30pm - 2:35pm

AKASHVANI AIZAWL

REGIONAL NEWS UNIT

GOVERNOR

Larsap General (Retd) Vijay Kumar Singh-an vawiin khan Shalom Special School, Serchhip zirlaite chu Lok Bhavan Durbar Hall-ah a kawm a. Shalom Special School zirlaite hian Serchhip Battalion, Assam Rifles buatsaihin April ni 13-23, 2026 chhung hian Aizawl, Silchar, Shillong leh Cherrapunji-te tlawhin Study Tour an nei a ni.

Larsap chuan Assam Rifles-in Shalom Special School, zirlaite khawhawi tizau tur leh, school hungchhung piaha tawnhriat an neih nan ti a study tour an buatsaih chu lawmawm a tih thu a sawi a. Zirlaite hmangaih taka enkawl thintu zirtirtu leh nu leh pate chhuanawm a tih thu sawiin, tour chuan Shalom Special School leh zirlaiteah hmasawna rah duhawm tak a thlen ngei a beisei thu a sawi a. Assam Rifles hotute chu an theihna zawn apiangah Shalom Special School ngaihsaka chhawmdawl zel turin a chah a ni.

He hunah hian Shalom Special School zirlaite hian Larsap hnenah thilpek an hlan mai bakah study tour chu nuam an tih thu an thlen a. An School chungchang leh tour hlimthlate thlir ho a ni bawk.

Shalom Special School, Serchhip hi August ni 17, 2005 khan Chief Minister hlui Pu Lal Thanhawla'n a din a. Tuna an school building ni ta sakna tur lungphum hi Mizoram Larsap hian Eastern Army Commander anih lai, January 2010 khan a lo phum sak tawh a; 4th Assam Rifles te'n Military Civic Action kaltlangin an sak sak a ni.

Shalom Special School, Serchhipah hian vohbik zirlai 36 an awm mek a ni.



HSLC RESULT

Mizoram Board Of School Education-in High School Leaving Certificate (HSLC) 2026, RESULT vawiina tihchhuahah zirlai exam zawng zawng zinga zaa 80.31 an pass a, kumin hian kal dan phung thlakin, zirlai titha Top 10 leh zirlaite pass na division tarlan a ni lo.

Kuminah hian exam beitu hi zirlai sing 18,257 an awm a, zirlai sing 14,663 in an pass-a, exam zawng zawng zinga zaa 80.31 an pass a, nikum leh kum hmasa aiin pass percentage a tha zawk a, kum 2024 khan HSLC Exam hmachhawn zingah zaa 73.37 an pass a, kum 2025-ah zaa 76.68 an pass a ni. Kumina state puma ti tha ber chuan mark 480 a hmu a, nikum a ti tha ber aiin mark 1 in a hmu sang zawk a ni.

Candidate zawng zawngte pass vek school 146 an awm a, candidate zawng zawng fail vekna school 13 awmin, fail vek zingah hian sorkar school a awm lo thung.

VC

Kumin HSLC exam-ah hian compartment 117 an awm a, kumin HSLC exam ah hian mipa aiin hmeichhia exam hmachhawn 1,328 in an tam zawk a, pass zat pawh hmeichhia tam zawkin mipa aia hmeichhe pass mi 951 in an tam a ni. Deficit school in ti tha ber in za zela 92.62 percent an pass a, private candidate pass percentage hniam ber in 49.66 percent an pass a, Subject malah Social Science ah fail an tam ber a, 3258 an fail a, Mizo/Language subject ah fail an tlem ber thung a, 469 an fail a, Mathematics-ah 100-ah 100 hmu mi 5 an awm bawk. District zingah Aizawl District pass percentage a sang ber a, 89.60% a ni a, Lawngtlai District an hniam ber a, 61.49% an pass a, nikum ah pawh Lawngtlai District chu a hniam ber a lo ni tawh a ni.

MBSE Chairman Pu JH Zoremthanga chuan MBSE pisaah thuthar thehdarhtute kawmin, kumin hian exam zawhnate chu LOTS atangin zaa 60 siam a ni a, abak zaa 40 chu Application leh HOTS atanga siam a ni bawk tih a sawi a, result bu-ah Top 10 an tarlan loh chhan chu CBSE leh CISCE bakah Board lian deute kalphung a ni a ti a, hei hi NEP 2020 in kaihruaina a siam credit system leh grading system kalpui tur a hmalak lawkna a ni a ti.

MBSE Chairman chuan Zirna in hma a sawn zel theih nan Question pattern tih danglam zel tum a ni tih sawi bawkin, kumina compartment 117 te chuan admission an tlai lohna turin compartment exam buatsaih thuai an tum a ti a. HSLC result complaint hun chu ni 7 chhung hawn a ni dawn a ti a, improvement pawh kuminah vek exam theih a ni dawn a ti bawk.

